



**KEMENTERIAN SUMBER MANUSIA
KENYATAAN MEDIA**

PERLAKUAN BURUH PAKSA OLEH MAJIKAN

1. Saya ingin memaklumkan bahawa seorang pembantu rumah warga Indonesia dan seorang pembantu rumah warga Filipina telah diselamatkan oleh Jabatan Tenaga Kerja Semenanjung Malaysia (JTKSM) dan Jabatan Tenaga Kerja Kuala Lumpur (JTK KL) pada 14 Mac 2023 semasa Operasi Menyelamat di bawah Akta Anti-Pemerdagangan Orang dan Anti-Penyeludupan Migran 2007 (ATIPSOM). Operasi ini adalah susulan laporan daripada pihak Kedutaan Besar Republik Indonesia (KBRI) setelah anak pembantu rumah warga Indonesia tersebut berhubung dengan pihak KBRI.
2. Terdapat beberapa elemen yang menjurus ke arah buruh paksa telah dikesan seperti mangsa dikurung dan tidak bebas keluar rumah, tidak dibenarkan berkomunikasi dengan orang luar, paspot dipegang oleh majikan dan bayaran gaji tidak diberikan.
3. Menurut kenyataan awal, pembantu rumah warga Indonesia itu hanya dibayar RM400 untuk tempoh 5 tahun pertama bekerja dengan majikan tersebut dan dibayar RM650 sebulan selepas tempoh tersebut sehingga sekarang oleh majikan yang sama. Majikan turut mengakui bahawa pembantu rumah warga Indonesia tidak diberikan sebarang alat komunikasi untuk berhubung dengan orang luar termasuk keluarga pembantu rumah warga Indonesia

tersebut. Beliau hanya berjaya dikesan oleh anak setelah berusaha mengesan pembantu rumah warga Indonesia tersebut menggunakan media sosial.

4. Pembantu rumah warga Indonesia dan pembantu rumah warga Filipina yang digajikan oleh majikan yang sama telah diberikan Perintah Perlindungan Sementara (*Interim Protection Order – IPO*) sementara siasatan lanjut dijalankan oleh pihak berkuatakuasa. Operasi Menyelamat ini turut dibantu oleh pihak Polis DiRaja Malaysia (PDRM) dan pegawai-pegawai dari Pejabat Sekretariat Nasional Mengenai Anti-Pemerdagangan Orang dan Anti-Penyeludupan Migran (NSO MAPO)
5. Saya ingin mengesa serta menasihatkan majikan supaya bersifat bertanggungjawab dan berperikemanusiaan kerana kes-kes sebegini telah menjejaskan imej negara di peringkat antarabangsa. Ini juga secara tidak langsung akan mempengaruhi penilaian tahunan oleh Jabatan Negara Amerika Syarikat dimana Malaysia sedang berada di tahap terendah (Tahap 3). Insiden sebegini juga telah banyak menyukarkan perbincangan KSM khususnya dengan Negara-Negara Sumber dalam mendapatkan khidmat pembantu domestik kerana dilihat tidak memberikan penekanan kepada aspek kebajikan pekerja khususnya pekerja warga asing.

YB TUAN V. SIVAKUMAR
MENTERI SUMBER MANUSIA
PUTRAJAYA
15 MAC 2023